

Miro hobi

1. Sar džanav, hoj o čhave na avena khere, ta mange lav andro vast o thavora u sivav o obrusa, oda hin ajsi but'i, paš savi mange pol'ikores šaj gil'avav u na kampil mange pal nisoste te dumininel. Tiš rado štrikinar o čapki, imar kerd'om čapka savore mire amalenge, le čhavorenge, le manušenge, save manca keren andre but'i. Dav lenge o čapki, the na phučav či kamen abo na. Ko džanel, či len varekana lena pre šero.
2. Aver miro hobi hin, hoj sikhlu'uvav te bašavel pro klavesi. But mange na džal, bo na džanav, sar te bašavel. Cind'om mange e gend'i, the latar sikhlu'uvav gadžikane gil'ora, ajse predal o čhavore. Bešav paš o klavesi the štar ori. Te dikhav avre romane manušen te bašavel či pre fejsbukos abo pro Youtube, ta na džanav, sar oda keren. Me džanav o noti, no sar mange vareko na phenel, savo akordos te kikiđav, ta na džanav nič. Vareko džanel korkoro te bašavel u mange kampil paš o klavesi te bešel the te bešel.
3. Me but rado tavav the pekav. Imar but berša kidav upre o recepisa pro chabena. Či tade chabena abo peke gul'ipena. Hin man but recepisa, the sako kurko pekav vareso gulo. Te na l'idžav le čhavorenge, ta anav o pekibena andre but'i. Keras amenge kaveja the chas.